



CARLO THELEN

*Lobbyist fir Rulings, Rüstung a russesch Suen
„Wann d'Leit zu Lëtzebuerg méi Suen hunn,
fléissen déi an d'Ausland.“*

De Carlo Thelen, Generaldirekter vun der Handelskummer an aktiivste Spriecher op *RTL* nach virum Fränz Aulner, weess, wat déi Lëtzebuerger Wirtschaft brauch: de Wirtschaftswuesstem. A wat Wuesstem ugeet, ass de Carlo méi aggressiv wéi eng Kriibsmetastas. Mindestloun? Schlecht. Sonndes fréi? Schlecht. Méi Fraen a Féierungspostiounen? „Wa keng Fraen do sinn, da sinn ebe keng do. Da kann een se net erbäizauberen.“ Staat a Bürokratie? Kann duerch KI ersat ginn. A Mënscherechter? Och schlecht. Do hu Länner, wou bei der Sklaverei net sou genee higekuckt gëtt, e kompetitive Virdeel.

D'Zukunft gesäit hien awer net just schwaarz. De Sekretär vum Militärindustrie-Interessensverband *LuxDefence* hofft op d'Rüstungsindustrie. An doduerch, dass déi Belsch-Lëtzebuergesch Wirtschaftskummer a Russland Seminarer zum Ëmgoen vun europäeschen Sanktiounen ubitt, kënne mer och hei vun all Sait profitéieren. Falls de Carlo Thelen gewënnt, kënne mir garantéieren: säi Gëllent Kallef huet aus Käschteneffizienzgrënn definitiv nach ni eng Wiss gesinn.